

[1]香港有好多大大小小嘅公園，其中比較出名嘅，喺港島有維多利亞公園，喺九龍就有九龍公園，新界各區都有大型嘅中央公園，你哋去過幾多個？

[2]廣東話有一句歇後語：太公分豬肉——人人有份。以前每逢清明、重陽節，啲人都會一家人聚埋喺祠堂舉行祭祖儀式，由一家之主嘅太公(即係曾祖父)負責分豬肉畀大家，啲嘢食通常都「人人有份，永不落空」嘅！唔知你哋父母分嘢嘅時候，係咪都係噉嘅呢？

[3]你有冇聽過「大風吹」遊戲？遊戲玩法係：首先大家圍圈坐好，搵個人企喺中間做「鬼」。一開始鬼會話「大風吹」，其他人要問「吹咩咩」，然後鬼可以答「吹走XXX(例如：戴帽)嘅人」。有呢啲特徵嘅人要即刻起身互交換位置坐，鬼都會趁機搶位坐。最後冇位坐或者聽錯指示、起錯身嘅人就要做下一個鬼。

[4]喺新界大埔林村有棵好出名嘅許願樹，每年農曆年頭，好多香港人都會去許願樹祈福，祈求喺新嘅一年，身體健康，工作順利。

[5]香港好多公園都有小食亭，賣啲凍飲、雪糕雪條，仲有本土特色小食，例如咖喱魚蛋、燒賣等等。

[6]好多時候，大人同小朋友講故仔，都會將一啲物件或者動物擬人化，好似太陽伯伯、月亮哥哥、狐狸先生，令到個故仔聽起嚟生動有趣啲。

[7]有一種「帽」，係人都唔會想戴嘅，就係「綠帽」，意思係一個人嘅伴侶有外遇。後來仲衍生出網絡潮語「帽事嘅」(「帽」同「冇」同音)，用嚟笑啲戴綠帽嘅人。

[8]好多學廣東話嘅人都會用錯「多謝」同「唔該」兩個詞語，「唔該」係多謝人啲嘅幫忙(thanks for a favour)，亦可以用嚟表達please 或者 excuse me嘅意思，而「多謝」就係用喺物質上嘅。

[9]香港有好多賞月嘅好地方，除咗山頂公園，市區仲有中山紀念公園、啟德郵輪碼頭公園、西九海濱長廊等等。

[10]香港嘅夏天係特別熱，氣溫可以去到三十幾度，戶外活動要小心中暑，最好戴帽同埋着淺色嘅衫。

[11]帽除咗用嚟遮太陽，仲可以用嚟配搭唔同嘅服飾。香港人最常戴嘅係棒球帽(Cap帽)同埋冬天戴嘅冷帽。

Author: P C Chan